

南海百詠續編卷二

瀋陽樊 封昆吾著

後學李定源本之
受業馮 健松齋
受業張正翬華堂
姪孫樊 淙聲甫 校刊

佛寺

六榕寺

在西城花塔街梁大同三年曇裕法師於西域
求得釋迦舍利奉敕建塔於廣南賜號寶莊嚴
唐時王勃嘗撰舍利塔記勒於寺壁宋端拱中

南海百詠續編

卷二

一

大修治之改名淨慧寺後燬於火塔亦傾圮無
存元祐五年郡人林修議建復之求其故址不
可得夢神告以在子城朝天門外四環有九古
井者即塔址也果得之而塔工乃成蘇子瞻謫
惠守嘗遊其寺題曰六榕遂有今稱明洪武六
年割其寺之半以建永裕倉八年僧道堅乃於
塔之東偏另建覺皇殿寺門東向局式卑隘無
復堂皇舊制矣咸豐六年七月朔日塔頂為颶

風摧墜闔郡觀瞻所繫經將軍長公與督撫會
商提動海防經費羨餘銀令旗員督修不十閱
月工成工堅料實費僅萬餘金焉

堵宰誰燒賽月燈客寮雲散打包僧賜山尙有交龍牒
紫印泥新作信憑

南漢時上元中秋輒登塔燃燈以兆豐稔號曰賽月
燈各巷里亦壘瓦爲塔集薪燔之火遍三城亦奇觀
也至於今其俗尙存萬厯甲寅天啟辛酉其塔於黎
明前嘗放佛光二次散彩呈輝榮光亘天邑人黃衷
爲文紀之兩藩入粵寺爲藩下佔踞主僧今湛與平
南有故力丐於王乃逐軍人而以寺還僧給有券牒

南海百詠續編

卷二

二

面鈐平南王印方廣四寸垂薤古
篆紫泥豔新今藏主僧慶韜處

戒壇

在光孝寺後盤福里內劉宋時西僧陀羅三藏
來粵手創此壇以安梵喙梁天監三年智藥三
藏寓居之嘗手植菩提樹於壇前預識日後百
年當有肉身菩薩受戒於此大興佛教於東土
也唐儀鳳元年六祖大鑿祝髮於樹下躬受衣
鉢遂大衍南宗於是漸教微而頓教大興矣宋

初稱乾明院又名羅漢院後併入光孝明代仍
摩爲兩寺東壁有空隱和尚紀事碑叙述頗詳
智藥禪師大道場訶梨猶放古時香肉身菩薩今安在
已隔風幡尺五墻

順治庚寅之役王師列礮於西山以攻擊大城寺背
正當其衝雕甍繡宇悉爲瓦礫場矣底定後左右盡
屬兵房數尺金龕委擲荒草間總兵班際威稍爲修
復而門堂隘陋與山廟叢祠無異矣乾隆中詩人毛
西贖嘗
隱其間

大佛寺

南海百詠續編

卷二

三

在南城龍藏街卽明代龍藏寺故址後改爲巡
按行署康熙三年南疆莫謐平南王自捐王俸
營建茲宇上爲 天子祝釐制式悉仿 京
師官廟世尊慈範亦摹之北匠云

雌霓翔霄沍麴塵三城迺降九重春黃金布地圍龍藏
顛首南交祝紫宸

順治十四年平南王遣其子之信之孝之廉之隆之
輔之佐六人赴京宿衛咸授秩任有差之隆以才器
矜貴奉 旨尙固倫公主晉秩固倫額駙婚禮既
成額駙屢請侍主返粵以修省覲禮因寇氛未靖未

遂所請至康熙六年四月，准額駙省覲由通河水路取道蘇杭以達粵，八月朔公主與額駙尙之隆至羊城，以家人禮謁平王於邸第，獻金帛進牲醴有加。在邸寓居八日，以月之十日稟假歸甯，平王親送之南門外，額駙等遂還都，是寺卽當年祝釐淨壇也。前期建築，故至爲莊嚴，之隆在都聘請班禪大喇嘛四十人同至廣東，修四十九日無遮勝會，齋醮之盛亦近世所希觀。今南榮前高碑矗立，文字番皇澹歸和尙筆也。

萬善寺

在粵秀峯巔，明永樂元年都督花英建祀大士者，綺樹周遭，丹梯百級，憑欄登眺，目極千里，殿

南海百詠續編

卷二

四

前有鐵香鑪一器，徑僅尺許，高可四寸，周刻十二時肖像，鑪蓋亦有十二像，竅焚香於內，歷一時則一竅出煙，他竅則否，蓋法物奇寶也。

芙蓉繡錯，曼丹梯紫閣琳房，日角齊不爲賞春頻躡屐。

九重天上仰宸題

道光辛丑，夷籍經商細故，輒敢犯順，疆吏撫綏失宜。四月八日，突踞城北礮臺，以爲要脅，計入旗兵丁防禦，綦嚴。夷酋盛陳攻具，疊犯北門，礮火矢石密同驟雨，衆見寺頂有白衣神女披髮戟指，以當夷隊，礮矢甫及，雉堞卽墜，落無餘。夷人駭懼，請逆將軍憐而撫之，以其事聞於朝。蒙恩御書慈祐清海四字。

恭懸殿楣以答神庥從此奎光燭斗
海國澄清瞻仰者咸生歡喜心矣

夢覺菴

在西城上古里唐之仁王寺故址順治十五年
靖藩下總兵徐成功建初成功之弟成名夢見
三僧來借宿次日有人以銅佛三尊求售其慈
範宛如夢中人大異之就營地築斯菴而供奉
三佛藩使莊有筠為文述其因緣今勒石廊東
寺基頗廣且多古跡廢礎遺磚尙是唐時雕鑿

南海百詠續編

卷二

五

托鉢當門笑口開天然歡喜不須猜軍中佛筏原無相
且借空營築講臺

徐成功正白旗漢軍隨靖王南征薦擢左翼總兵順
治八年偕副將高進庫先啓玉等收復高雷一路二
月師次陽江偽提督李忠明引狼兵三千列柵以拒
成功大破之進抵電白偽監軍道郭光祖迎降令人
傳檄羅定其守將郭登第馬應龍亦率眾來降三月
大軍由石城至廉州克其武利營進定靈山四月渡
河營於舊州斬偽總兵甯武忠及王硯山寇李士元
等於是兵威大振雷州府渠帥王翰李人超開城降
九月官軍入居雷城獲叛鎮李成棟之子元允誅之
十二月靖王親統大軍至雷州規取瓊南成功獻策
日瓊州孤懸海上環山列島古稱天險而杜永和等
由省垣敗遁盤踞其境收納餘燼其勢方張取之匪

易不若廣散軍帖宣揚國威赦其殊死待以爵祿瓊州可坐而定也王從之而永和負固不屈九年七月成功率師渡海永和乃降十年八月隨靖王討潮州叛鎮郝尙久誅之凱旋晉世職十三年調征臺逆二月兵至揭陽再戰於萬里橋賊死守府城加築月墻以禦我攻三月省垣礮船至提督吳六奇攻其南面成功率礮兵攻其西北賊棄城遁遂復揭陽時賊雖航海遠去然飄忽無常遂請暫駐揭陽以防侵突平王遂擢成功潮鎮總兵焉十八年靖藩移鎮福建成功改補閩安鎮康熙五年卒於任 賜恤有加子鴻弼充藩下叅領疾耿精忠之僭妄也因年滿引見之便在都察院首告精忠在鎮不法於反正後仍蓄逆謀擅殺總督范成謨乞迅賜提究以清反側事下九卿議王大臣請暫繫鴻弼於刑部以備對質十九年耿精忠鎖拏至京法司面質鴻弼所控皆實置精忠於法鴻弼交部從優議叙二十年補授福州

南海百詠續編

卷二

將 協副

吉祥菴

在東城高華里康熙己巳年韶州府判尙有璋建庭有卧碣漶滅不可讀階前貝樹一株生香四射古綠拏空百年植也菴式樸野頗饒古意物阜民康妙吉祥野菴春老貝多香老僧不解滄桑劫

豔述新城破晉王

尙有璋字完我平王族孫也由縣令陞韶州府判順治十一年奉命協守新會縣在事有功晉一秩初偽

晉王李定國犯高州張月舉城降陽春陽江恩平皆陷定國營於肇城隔河將趨新會十一月平靖兩王至肇慶總督李率泰擬守新興平王不許議守高明平王亦不許率泰日封疆尺寸豈宜棄賊今不守兩邑甯有說乎平王日定國百戰中原其志匪細今之所急在戰不在守也二邑去水遠地非要害兵少不足守若撥重兵倘敵以偏師綴我而以重兵索戰我進不能戰退則喪其所守此兵家大忌也今天淫雨江水大漲從山絕路從水阻舟弦矢膠解瘴癘大作無論守不宜分即戰亦不可速遂撤兵還廣州肇人無不怨悵以爲玩寇殃民矣定國見兩王軍退果攻新會許爾顯死守之百計不能下至九月天晴十一日兩王始整隊下江門連克其水柵陸寨命徐成功威登科領軍糧十萬人屯新會城協力防守兩王營於三洲墟口時定國聯營十餘里勢頗張平王計衆寡不敵思出奇以挫其鋒令步卒誘戰馬軍斷後定

南海百詠續編

卷二

七

國親率鐵騎來追先以關西精銳五百躡王平王設三伏以待結陣徐退以誘之賊果深入三伏並發生擒其總兵武君禧遊擊王天才等十六人此十六人者皆萬人敵定國侍以破敵者也既被擒其氣乃懼陷高明合兵二十餘萬以逼新會分扼三洲金利富灣羅屈等隘口十一月初十日靖南將軍珠瑪喇統兵一萬至偕兩王營於新會城南賊營於城北排戰象大礮於兩峽口別以鐵騎屯於峽左山上以爲犄角平王乃令副都統畢力克圖章京賚塔統正黃正紅兩旗滿洲蒙古兵副都統范達禮統左翼漢軍兵章京尙之智副將威登科統藩下兵合擊其山上之屯騎十四日黎明兩王總督及靖南將軍領隊督戰號令所指無不以一當百日午山上之騎奔潰峽口之陣亦動總兵連得成田雲龍栗養志叅將張榮等分隊齊進鎗礮如雷矢石若雨呼聲撼天地賊驚駭陣大亂死者山積定國登高望之撫膺大痛日吾縱

橫西南垂二十年未逢敵手今來廣東一敗至此非
尙可喜之能殆天意也率殘卒奔高州畢力克圖東
拜領鐵騎三千追之新會之圍始解諸將論功尙有
璋於阨守草韃洲時出奇計奪獲敵糧以濟軍食列
頭等加知府銜十二年正月定國由高州竄廣西扶
來僅以二十餘騎投僞秦王孫可望從此粵境又安
始無西師焉

五桂菴

在城東北隅水關側明萬厯三十八年詩僧行
儀創建名福善菴背負女堞面臨巨池韭畦瓜
棚大有江村致上人與諸社名流結放生會每

南海百詠續編

卷二

八

屆中元香鉢雲鏡傾動三城焉國變後池鞠茂
草菴爲狐鼠窟矣總兵吳進功戍守東城樓乃
修復之嘗遇大比年有試士五人僑居之一時
同領鄉薦好事者改題菴額曰五桂從此香火
緣盛爲俊髦傳舍矣

燕山五桂係同懷羨此羣英屬計偕一第遂爲鄉國豔
更無人會八關齋

吳進功正紅旗漢軍隨平王航海歸誠授一等阿思
哈哈番從征廣東充藩下總兵官屢建戰功未嘗妄

殺生性佞佛蒲團木魚不離於戎馬間軍人稱爲吳和尚粵人頗敬愛之順治九年冬香山土寇梁子直殺縣宰張令憲踞城以叛進功偕副將曹得仁往討之十月十二日師抵石岐監軍道劉尹覺請急攻進功日子直亡賴徒耳民非甘心從逆爲其脅逼而已招之卽來降也曹協請往諭之子直閉城不納曹協怒將攻之進功日彼拒我者怯我也密令典史陳忠潛從水關入開導者民十五日士民縛子直及其黨百七十人以獻斬於市縣民謹頌末嘗傷良善一人其他布德安民事多類此

檀度菴

在越井岡之陽女尼靜室也始於康熙四年平

南王建爲菴主自悟比丘焚修所

南海百詠續編

卷二

九

一串牟尼脫火坑傭中佼佼鐵錚錚蒲團不墮紅羊劫

笑彼飄零孔四貞

平南有子二十三人女十七人其幼女某生卽茹素禮佛不諳家人操作觀諸兄之橫恣憂患成疾力懇爲尼王不能奪選宮婢十人爲侍者建菴居之號曰自悟羣稱之爲王姑姑云姑姑博通梵典戒律精嚴先平王而示寂不覩家難今菴尙有影

容披髮衣紫蛾眉雙蹙若重有憂者

孔四貞者定南忠壯王孔有德之女忠壯殉烈於桂林闔門遇害四貞年甫六歲得衛士某保護回京

上深憫之留養

大內

皇太后撫爲養女封

固倫公主食定南王全俸及笄奉

旨許字義王

孫可望之子延齡于歸後延齡擢廣西將軍四貞不以夫貴自用親王儀衛領舊藩四佐領兵隨延齡之

任夫妻頗不相能及延齡從逆四貞刺血告變有
旨褒美迨延齡為吳世琮所戕四貞攜其舊部反
都依族子孫穎灝 上追念蓋臣命仍食定南俸
未幾卒學士吳偉業為孝女行以哀之詩載梅村集

慶雲菴

在新城東橫街地卽宋時之山川壇順治十三
年元旦五色卿雲現於省垣百僚稱賀藩下總
兵官張國勛因建是菴以祝太平未幾而海氛
蕩定蓋先幾之徵也廊下有道光十年將軍慶
保重修碑敘述菴之始末頗詳備

南海百詠續編

卷二

十

非煙非霧繞江城日有重華告太平島嶼旣搜鯨鱷盡
南瀛從此遂銷兵

張國勛正紅旗漢軍父洪義隨左夢庚投誠授騎都
尉世職順治七年國勛襲職隨平南王征廣東以克
城功晉擢水師總兵爛於潮汐駕駛十七年高廉多
警海寇鄧耀踞龍門島李常榮踞海陵島潛通臺逆
鄭成功而僞漳平伯周金湯往來南甸招納流亡明
之故臣宗人咸聚兩島間六月國勛承王命徂征會
舟師於陽江十六日師次海陵島口李常榮率眾迎
降官軍入踞其島金湯聞信乃糾合王懋德黃確鄭
球三巨股及拔賊李王分扼隔水南廳上下兩川七
月官軍分路進剿遊擊李崇元領鐵騎由陸攻其上
下兩川降將李榮周王駕戰艦攻其南廳八月國勛
等破賊於上下川斬王懋德等生擒周金湯於是水

陸合兵進攻龍門島前鋒副將張瑋由山路遊擊易知由水路叅將岳世隆領礮船爲頭敵鄧耀傾巢來拒廿三日戰於島口官軍五路搏擊遂大破其衆鄧耀遁安南降其幫匪二萬餘釋回難民五千餘十八年秋國勛又統舟師進剿永豐寨其魁蕭國隆者故繡花針王與餘黨也四結叛援屢爲焚掠在亨峒者則有陳期新在白頭萌者則有洪彪在海萌者則有周祥在古城者則有勞泰在雷岡雙水者則又有鄧雄鍾良等八月國勛至永豐國隆掘壕加塹作死守計官軍築長圍困之遂分剿亨峒諸寇斬陳期新等會班際威領礮船至九月廿四日遂攻克永豐寨國隆舉家自焚死收其軍貲無算乃相厥隘要請於廣肇接壤添設那扶營守以叅遊大員而彈壓兩郡五縣部議如所請於是西塞澄清盜風止息焉

雙山寺

南海百詠續編

卷二

七

在大北門城闔下負山面郭花藥成村孔道中
靜宇也順治丙戌靖藩下旗鼓佐領張國祿捐
建堂有題名碑自靖王而下藩屬文武咸有飲
助近爲俗髡所踞僑厝旅櫬收賃廡之資以供

飲博云

雙掌雄分一徑過精藍小寄綠雲窩四圍生翠籠啼鳥
駐馬何須弔尉佗

張國祿鑲黃旗漢軍始爲靖藩護衛晉旗鼓佐領順治八年十二月隨征瓊州九年春大軍駐雷州僞督

杜永和遣其將張月等扼守海口盡匿其舟船官兵久不得渡國祿持招降軍帖偷達定安諭其四民於是薙髮來降者萬人永和不能禁亦開城降瓊州平十一月凱旋授永和總兵銜論功國祿加叅將職

西禪寺

在西郊龜岡下建始於宋瀉熙間明正統初毀於黃蕭養景泰三年中官某修復之請於朝敕賜龜峯禪寺香火冠一時殿東有六祖銅像慈範莊嚴後因寺饒富故輔方獻夫垂涎謀於學道魏校以扶聖教爲名毀其像奪其田攘爲己

祠邑庠黃海若心不能平訟訴經年官不敢決國變後燬於兵燹順治戊戌靖藩總兵官曾養性捐貲修復經閣雲寮轉感當年巡撫李棲鳳爲文紀之勒石殿西

黃耳功成藉草眠敢隨封豕吠青天千金媚佛希慈祐
佛尙難安瓦數椽

曾養性山東人驃騎將軍曾法孔之子隨靖藩鎮廣東與馬九玉同爲總兵最用事尤詔事世子耿精忠順治末徙鎮福州繼茂尋卒精忠襲王爵淫虐不法養性導以聚斂閩人恨之刺骨康熙十三年吳三桂

叛於雲南誘精忠從逆六月初三日精忠裂衣冠蓄
頭髮亦踞福建以叛養性領兵犯浙江黃巖鎮執總
兵阿爾泰殺之進屯黃瑞山遂攻天台阻截官軍糧
運十四年掠台州府城爲總兵吉勒塔布所敗退屯
涼篷隘口掘塹拒守尋爲副將穆赫林擊遁遂棄黃
巖反福州十五年復犯温州六月据守古溪十月精
忠闔屬反正養性始就撫二十一年同精忠逮繫至
刑部法司鞠實議得叛鎮曾養性助逆謀叛皆有顯
據屢次領兵與官軍接仗且戕殺總兵阿爾泰等多
員與他犯不同應照謀叛律凌遲處死是年冬同耿
精忠馬九玉九人
正法於都門西市

華林寺

在西關繡衣坊梁普通七年達摩航海至粵卓

南海百詠續編

卷二

三

錫是間爲南宗初祖廣人曰其寺爲西來初地
實嶺南最古之刹也順治十三年僧人宗符大
修之手植三松於庭今皆枯死道光末主衲祇
園創建羅漢堂親謁浙江淨慈寺描繪五百應
真金容歸而模塑築田字殿以奉安之心香慧
炬傾動三城焉

典文充藏律三千畢世探搜苦未全一葦航來無字教
南宗從此衍空禪

天方象教日戒日律釋氏典文有北有南所謂由昏
漸慧由覺漸悟猛勇精進漸積成宗者也粵之梵教
始於曇摩耶尊者繼之者求那羅跋以及智藥三藏
莫不梵唄訓受戒律修明迨達摩南來不落言詮直
指心印佛法二
而南宗衍矣

寺藏平南王壽屏一座雕梨嵌金文字工好蓋靖藩
由閩驛致爲平王八旬祝壽者在來士多捫讀之

長壽寺

在西關順母橋北明季巡按沈正隆建地接荔
灣西通珠海瘴雨蠻風尋就傾頽康熙中吳僧
大汕者出貲葺治土木華麗花竹成蹊有繪空

南海百詠續編

卷二

十四

閣離六堂半帆廊諸勝油壁春航戶屢常滿王
文簡奉使來粵嘗與諸才人觴詠是間題楹聯
云紅樓映海三更日石澗通江兩度潮可想見
其勝槩矣大汕以事遞籍池北偶談曾紀及之
朱烏瑤窗旭影遲禪牀閒對好花枝當時亦有金和尚
未必風流勝阿師

大汕號石濂吳縣人狡黠多智以訟亡命得三茅耶
術能役神鬼剪髮爲頭陀裝附賈舩至安南時方亢
旱國主募術士祈雨汕乃大書寓門曰石頭陀有甘
霖出賣國人震傳迎至郊壇觀其所爲汕作法三日

而甘雨大霑國主延居王宮尊爲聖僧焉汕結筏池
中絕粒七日爲國人祈福益神之稱爲活佛所得布
施無算蓋先屑牛鬻襍以藥餌丸爲串珠每日潛服
之以療飢也其許多類此居安南數載積鏹巨萬與
其徒捆載以歸遂營繕茲寺廣栽花木潛蓄妖伶一
時豪紳巨賈樂與之遊始猶僞爲恭謹繼則鮮衣華
輿出入各當事關說通賄其門若市矣臬使許嗣興
惡之杖遣回籍旋斃於路今佛閣有藤織大彌勒象
卽汕藏鏹南歸具也金和尚亦康熙時豪僧事
與汕類漁洋山人嘗紀之蒲留仙亦備書之

皇華寺

在小北外皇華塘明末詩僧函可禪室也棲濠

面郭紅棉繞門景最清幽後因訟累遣戍甯古

南海百詠續編

卷二

五

塔寺就荒圯村人借爲厝樞室乾隆十九年糧

驛道龍廷棟請於兩院取爲女養濟院撥水利

羨餘以贍貧孀之無告者

彈指華巖水自東故山猿鶴歎飄蓬空餘種荔田三畝

借與神堯養斷鴻

函可博羅縣人名韓宗駭明尙書韓日纘之第三子
工詞章善文筆明亡爲僧自號贖人與澹歸今種輩
相往來寄鉢於此後爲怨家所訐配甯古塔在戍有
詩云三畝離支一畝塘長松千尺列成行主人猶自
不歸去草野空餘薜荔香
其寺之風致可想見矣

永泰寺

在東郊俗名太監寺明宏治中內監韋眷自建殿後有眷塑像冠帶緋魚侍者夾立寺僧祀之惟謹蓋眷當日置嘗業至厚緇流賴以贍生故不忘其德也

金碧秋林護綺寮不風庭院也蕭蕭溪山勝處留香火百載居然祀豎貂

眷本王振私黨宏治四年出為廣東市舶司監督貪暴驕橫屢激民變嘗侵匿關課二十餘萬兩為番禺

南海百詠續編

卷二

六

令高瑤發覺藩使陳選籍沒之天順中撒馬爾貢使來獻獅子取道廣東回國詐云欲往滿加刺更市眷得其厚賂將許之陳選上言夷人狡詐萬不可許倘屈順之必貽譏於外藩事得寢眷大憤恨遂撫拾他事疏劾陳選高瑤朋比為奸詔令臬使徐同愛勘問徐亦闖黨也文致二人罪降黜有差粵人無不切齒於眷而香火百年土偶無恙較碧雲寺之魏上公尤顯赫矣

白雲庵

在北郊象山之陽又名太平菴順治庚寅兩藩攻省垣時前鋒擊卡瞭望處也折戟沉鎗耕氓時於岡麓得之

一聲清磬透香龕不辨前溪與後嵐高下木棉多似錦
赤騰騰抱太平菴

菴爲兩藩所建壁有豐碑梁懸大鏞敘述底定之勛
其碑畧云順治七年二月六日王師抵五羊城下離
城里許我師駐焉予營於白雲之東靖藩營於白雲
之西與敵相拒凡九閱月迨復月之二日乃克此城
及壬辰春遠近就理民皆樂業而靖藩之師南下到
處迎降烽燧俱息乃卽舊營之巔旣建武廟矣又於
山之陰更建白雲菴以祀大士云云餘與武廟碑畧
同惟其鐘銘典雅堪備金石之採謹錄全文以待搜
討焉鐘文曰順治七年平南王恢粵二月六日抵羊
城北白雲山之下結營山阿凡九閱月將士奮騰兵
馬無恙其間鑄礮製藥隨手而應陰有神祐是年十
有一月二日恢復追溯不忘乃捐建太平菴內塑佛

南海百詠續編

卷二

七

景泰寺

在白雲九龍坑上宋景泰禪師道場也靈泉注
礪環植杉篁廣州八景中所稱景泰僧歸者是
也順治庚寅王師至粵堅城未能驟克乃造攻
具於寺前凡九閱月沿峯竹木斬伐殆盡澮水
童山無復杖錫聯翻古道斜陽當年佳致矣

萬樹松杉捲翠濤紅泉飛瀉石梁高天留奧谷開軍塢
且構隆衛克虎牢

平南既作長圍以困省城所攜攻具未敷應用乃命
總兵許爾顯擇九龍坑啓鑪鑄礮八月礮成計得四
十六位合舊有之五十六位每礮配彈藥五百餘通
復造火藥十三萬斤更命木工造大擋牌哈哈木雲
梯天橋狼筈竹屯諸攻具行有日矣匠氏稟稱輦礮
須車粵乏車匠北軍雖能斲輪輪有鐵穿以貫軸粵
土浮鬆不能作穿範佐領金有賞隊內有百姓者於
從化東山得紫標士以爲模而車穿始成於是晝夜
挽運至西山下
遂一戰蕞功也

海珠寺

南海百詠續編

卷二

六

在珠江之中怒濤四撼突起仙洲瑤房嘉樹恍
若蓬壺宋李昉英讀書處也

犀株映水翠幢幢雉堞鯨樓鎖大江千古登臨觴詠地
不教浮玉號無雙

李忠簡以宋寶曆二載登第厥後邑人張振孫將試
南宮大集名士於此觴詠竟日號曰龍頭會以爲登
第嘉符至今未改明季忠簡後裔建祠於上以奉祀
忠簡延縉流守之順治四年總督佟養甲以寺居省
垣要害建礮臺遣將弁戍守置神器焉康熙中巡撫
李棲鳳在祠前築危樓以爲遊人登眺所而仍舊名
日得
月樓

海幢寺

在珠江南岸南漢千秋寺故址明季邑人郭岳龍購爲別業順治初僧阿字始建佛屋於旁額曰海幢阿字故與平南王善康熙十一年展拓寺基平藩自建天王殿王福晉舒氏建大殿總兵許爾顯建二殿及後閣巡撫劉秉權建山門局式恢宏溪山形勝甲乎嶺南

瑯關四啓聳晴霄梵啐聲同大海潮寶馬不來宮醮歇
南海百詠續編卷二 九
賸他鷹爪守瓊寮

寺內所用之綠色甃瓦均舒福晉所布施初兩藩營造府第咨請部示懇照王貝勒制式得用琉璃甃瓦以及臺門鹿頂嗣奉部駁民爵與宗藩制異察平靖兩藩均由民身立爵所請用綠色甃瓦之處礙難准行時粵東啓甃瓦皆成而未敢擅用乃盡施諸佛寺若粵秀山之觀音寺武帝廟及大佛寺皆此種甃瓦也今寺之香積厨大齋竈尙是螭甃砌成者近爲骨董家易去殆盡矣殿東有鷹爪蘭一株尙是郭園故植蔓條作榦高出簷牙厯劫二三百載而芬芳若故亦靈卉也寺僧壘石爲臺架欄護之東南詩人題詠者甚多

大通寺

在通滄口南漢時寶光寺也宋政和八年賜名
慈應禪院內奉達岸禪師肉身化象故靈異甚
多舊跡渺茫未知何處相傳寺前有古井二每
逢江雨則搖曳生煙又稱煙雨泉羊城八景中
所謂大通煙雨者卽其境也村人近於寺後鑿
土井以當古蹟樹蒔花卉爲食業春紅秋白風
趣亦殊不劣

風篁雨檜攬寒煙龍氣重重上井泉萬厦寶光何處是
南海百詠續編 卷二 三
廢甑殘礎沒葑田

萬麻六年省垣大旱祈禱無驗四民迎達岸肉身於
交衢如術虔禱三日甘霖大霑四野霑足大衆請肉
像返寺九牛鼻之不能移玃卜像所願止願居訶林
焉無何寶光燬於火肉像蓋避劫也寺遂荒廢後里
人蕭子奇乃擇今地建寺迎像遂名曰煙雨寺坊額
曰大通煙雨復古蹟也香火不甚興感旗人祀之惟
謹乾隆己巳六月滿洲驍騎校珠隆阿等三十四人
薦送上官於滄口歸舟忽遇颶風檣櫓摧折船已傾
覆忽覩寺內有白光如長虹低垂怒浪中逆捲破船
置於寺前衆急趨寺頂禮仰見禪師肉身浪花遍體
濡濕中猶掛浮萍也於是繪圖
於壁再塑金身以識慈祐云

海雲寺

寺在雷峯林巒秀美明末僧今湛主持其間鼎
革後天然和尚主講焉平南鎮粵仰其高風爲
之廣置寺田更虔鑄佛像金光丈六以誌香火
因緣土木之盛近時罕有遂爲海邦上刹

璫難纔平黨禍深秣陵王氣遂銷沉上人高掉生花舌
喚起南歸鍛羽禽

天然名曾起辛以名孝廉教授鄉里青年卽披剃出家
父母姊妹咸爲僧尼人多怪之及國變縉紳故老
多遁蹟空門天然每爲之汲引世人始服其先見云
平南慕其高蹤聘迎至邸一宿卽告歸或問之日平
南海百詠續編

卷二

三

懷聖寺

在西城光塔街唐時回回國人禮拜堂也回教
之祖名貴聖穆罕默德彼教之人稱之爲貴聖
寺號懷聖者謂彼教之人懷念祖師貴聖也而
沿革志謂寺創於唐懷聖將軍故名然考唐六
典當時有懷化將軍別無懷聖之號志書蓋誤
也況寺內現有元時郭嘉碑文其贊云寺曰懷

聖西教之宗固明指所懷爲貴聖矣

望海須登最上層金雞晝轉夜燒鐙誰將懷化訛懷聖
壁有豐碑信可憑

寺有番塔高十六丈有奇輪囷直上絕無等級形如
酒罈唐時圓人之望海表也塔巔有金雞隨風可轉
以驗颶母消息夜則燃火以導歸帆拜殿之式有類
穹廬當中懸素帛繪一劍形謂是貴聖喜容圓民七
日膜拜一次男女環跪誦師號蓋圓紇舊俗也順
治庚寅大城底定兩王以內垣爲藩城文武解署悉
移新垣圓衆無所棲止總督李率泰擇南門外臨濠
一帶給圓衆居住本廟仍畱爲禮拜寺其後南勝里
濠畔街添東西兩寺暨小東
營省城共有四禮拜寺矣

道觀

五仙觀

舊在仙湖上周蓮溪祠前元季燬於火後徙於
坡山之巔明人合築三城丞相汪廣洋撫粵乃
鑄巨鐘建崇樓懸之以厭勝海嘯遂為闔郡雄
鎮嗣因形家言樓居申位象人肺肝擊鐘則民
多警禁勿考撞又名禁鐘樓順治十二年靖南
王繕治廟宇乃大修之立碑樓前焉

南海百詠續編

卷二

三

玉版高撐第一樓雄文真足耀遐陬功成百將題名後
此業何堪託沐猴

舊樓額題曰嶺南第一樓碑高二丈有諸將題名風
雨駭落文多缺泐謹錄全文以備金石採訪

文曰在昔軒轅問長生於空同義山乞長生於羨門
仙人所由昉云然口口口君子一志鍊形真丹將結
驂鸞可期積功累行口口口口口口口口口幽牒登
仙錄功行最普無如世界皆飽稔無餒饑若廣城之
五仙口口是歟按郡志建城伊始五仙突至騎羊持
穗祝斯民永無饑荒之虞言訖飛昇羊化為石郡人
感其異且德焉構為觀以祀之維肇剏之口口口漢
相沿以迄於茲觀之興廢不一趙宋以前不可徵矣
於元而一新於明而再新今閱數千禩五仙所祝猶
在人口粵岷嘉賴之不衰口口之功行洵普矣哉洪

惟我 皇上伏紫氣以登三秉黃離而用九堯燭
與道光齊照舜河與法水俱清時和歲豐涂歌巷誦
蒼生鮮昏墊之倫神仙有顯化之應予承 天子
敕藩撫蒞此邦目擊仙觀圯敝朱軒紺柱共榛荆以
邱墟月面星眸並烟霧而塊莽購材鼎新率令官民
合力鳩庀響應如雲更奉我慈闈 太老夫人李氏
秉心塞淵肅欽神祇捐發橐貲勦建勝事口口口口
口庭革口口於廢址蓋宮絳殿裁成布置咸以式黃
冠有舍步虛有堂口口口口口口口口事敏晨夕展力
越數月而口口口口口口口口長生之訣詎必飯青
精殮瑤漿哉獨其願力閎深祝無饑荒此好生一念
口口靡竟固真長之訣矣予感五仙好生之意口口
口口口口無口口口凡我靡弁爪士羣黎百姓尙其
勤進香膏薦信勿懈永禱五仙之靈口口口口應入食
其社莫可紀量卽予重建之志也是爲
記順治十二年乙未靖南王耿繼茂書

南海百詠續編

卷二

十四

又碑側一行靖南王捐銀二百五十兩買地一區擴
爲道院東齋永禁侵占據此則當日修理官廟以藩
府之尊尙須出貲和買則兩王在粵未必
如觚賸嶺南雜記大事錄所言之橫暴也

元妙觀

在西門直街唐之開元寺宋人改爲天慶觀洪
邁爲之記東廂有衆妙堂東坡亦有記碑石均
無存矣西院井甚清冽東坡所浚也今稱爲蘇
井舊有僞漢劉澄及二子銅像嘉靖時海內崇
尙道學提學魏校專獵浮譽取像燬之以其銅

鑄大鏡數十徧貽朝貴粵人復塑土偶特建功
德院以祀之

貞碣成塵鑄像鎔丹臺草滿井亭封步虛元夕人何在

只贖南朝一杵鐘

康熙五年平藩肇修廢祀是觀聿新視舊製有加勒碑琪林門內紀述頗詳蘇洪壽石久成灰土南漢精金幻化無存惟大殿宋鐘一具銑蝨完好文欵燦然係元豐三年林英等捐鑄者惜無銘贊堪備擇採

三元宮

在越井岡卽唐之悟性寺故址寺久廢順治十

南海百詠續編

卷二

三

二年平南王建爲道院榕棉深鎖人稱福地山
門前有巨井水味甘冽卽晉季之羅漢井與玉
龍泉相距不遠粵秀諸峯僅此一井千秋名跡
可徵諸目驗者也志乘家誤以悟性爲法性又
混牽虞苑之古泉爲羅漢泉遂成歧混

淺碧稠青拂不開紅棉花裏現樓臺胡麻一飯清涼界
爲訪長春燕九來

都門正月十九羣遊西頂白雲觀以謁長春真人邱處機名曰燕九自元迄今習俗相沿兩藩將卒皆北

產亦於是日共登三元宮以當燕九香車寶馬絡聯
若雲撤藩後此風稍息康熙四十三年提督金宏鎮
修葺之且置觀產以瞻羽流遂以九月
朔建九皇會凡九晝夜亦沿爲風俗也

應元宮

在粵秀峯東康熙七年海氛靖謐平南王建祀
斗姥摩利支天尊者也神像仿自肇慶七星巖
星冠瓔絡六臂趺坐兩手合掌兩手擎日月兩
手握弓劍天女捧槃夾侍左盛羊頭右載兔首
相傳明季熊文燦征劉香老時鏖兵瓊南菩薩

南海百詠續編

卷二

三

現形空際風雷四繞寇因蕩滅歸塑像於星巖
以昭神佑鼎革之際海疆弗靖至康熙四年始
克奠定所賴於神助者甚衆故建是廟以誌弗
諉也

瓔絡蟠胸六掌擎丹霄晝見火雷并何須神臂三千弩
已殪南瀛跋浪鯨

明之餘孽咸聚廣南出沒海島乘機煽禍順治十六
年秋平王出師攻克文村斬朱聿鐸及其帥王興越
明年收復海陵島擒渠首李嘗榮降其下周金湯等
十八年進定龍門島斬鄧耀遂破永豐寨誅降蕭國

隆等有差康熙元年春平高州陳豹二年平那畧楊二楊三并搜捕東順香五縣餘黨三年剿李榮周玉諸叛賊四年平那扶寨斬黃明初遂克大奚山而譚琳高諸股咸就擒焉海甸澄清罔非波臣翊運河伯也

鄭仙祠

在粵秀山龍王堂側道光初紳士捐建下有小園倚山爲榭架樹成屋將軍慶蕉園移奇石數十笏壘綴庭前多植梅槐以爲修禊所題曰靈巖香海其境以梅石勝也

南海百詠續編

卷二

三

花嶼雲縈榻趣深靈漱吹韻下遙岑芙蓉萬態移何處疑自金閭獅子林

純陽觀

在河南漱珠岡地近盧循故城宋之萬松岡也古松怪石溪山如畫嘉慶己卯羽士李青來始建爲道院觀後有臺青來禮斗處也阮文達閣部題曰頤雲壇時過從之

欲驗超辰構草亭特標璿管候明星前年拓地栽紅藥

鋤得松根宋茯苓

青來得西人算法精天文學著圓天圖說皆祖述利瑪竇南懷仁之言間採梅定九之說以成書阮文達收入省志藝文類刊刻行世觀察盧西津嘗與之論西人利器青來曰夷人火具精絕然不善用之適足病國弧矢之威著聞千古且兵在勇而不在器專恃則兵不足任矣火具烏足恃哉觀察大異之
啓土建觀時鋤得茯苓數石皆巨如斗蓋百載精英也青來服之年八十神氣不衰

安期仙祠

在白雲濂泉之左即明末陳文忠雲淙別墅故

址嘉慶戊辰羅浮羽客江本源築道觀於其間

南海百詠續編

卷二

三

有聽松坪索笑簷衣冠塚諸勝梅竹成畦實品

泉聽鳥佳境

跨蝶歸來覓故廬秋坪響踏屐聲孤修他別墅為詩藪

補種梅花一萬株

詩人張南山黃香石林月亭段級秋七人於觀左別築南雅堂廣植名葩奇卉感結吟壇補襖消寒殆無虛日伊墨卿太守為南雅堂記鏤石於壁

離明觀

在泥城河干地近陸賈故城偽漢時之郊臺雄

轟其傍道光初茶商創建以爲貯茗公局黃冠
守之橫瞰郡郭面納鷺潭風雲變態日盈庭檻
欲戰當時乏伍參枉將犀甲耀鷺潭可憐溷器紅成陣
取禦西戎太不堪

道光辛丑暎夷竄入珠江楚黔援軍幾及四萬有某
帥者不事攻剿惟日修祝禱大言欺人或有以夷砲
爲慮者某乃令官吏廣收婦女之便器及敗穢裙視
羅置江澚以爲厭勝夷人用砲摧之散碎無餘遂直
抵泥城消搖觀中援軍不戰
而潰夷酋整隊及城下焉